

全唐诗卷一百三十四

卷 134_1

【塞下曲】李颀

少年学骑射，勇冠并州儿。
直爱出身早，边功沙漠垂。
戎鞭腰下插，羌笛雪中吹。
膂力今应尽，将军犹未知。

卷 134_2

【寄镜湖朱处士】李颀

澄霁晚流阔，微风吹绿蘋。
鳞鳞远峰见，淡淡平湖春。
芳草日堪把，白云心所亲。
何时可为乐，梦里东山人。

卷 134_3

【宴陈十六楼（楼枕金谷）】李颀

西楼对金谷，此地古人心。
白日落庭内，黄花生涧阴。
四邻见疏木，万井度寒砧。
石上题诗处，千年留至今。

卷 134_4

【送相里造入京】李颀

子月过秦正，寒云覆洛城。
嗟君未得志，犹作苦辛行。
暖酒嫌衣薄，瞻风候雨晴。
春官含笑待，驱马速前程。

卷 134_5

【送钱子入京】李颀

夜梦还京北，乡心恨捣衣。
朝逢入秦使，走马唤君归。
驿路清霜下，关门黄叶稀。
还家应信宿，看子速如飞。

卷 134_6

【送綦毋三寺中赋得纱灯】李颀

禅室吐香烬，轻纱笼翠烟。
长绳挂青竹，百尺垂红莲。
熠燿众星下，玲珑双塔前。
含光待明发，此别岂徒然。



卷 134_7

【送人尉闽中】李颀

可叹芳菲日，分为万里情。
闾门折垂柳，御苑听残莺。
海戍通闽邑，江航过楚城。
客心君莫问，春草是王程。

卷 134_8

【送人归沔南】李颀

梅花今正发，失路复何如。
旧国云山在，新年风景馀。
春饶汉阳梦，日寄武陵书。
可即明时老，临川莫羡鱼。

卷 134_9

【送卢逸人】李颀

洛阳为此别，携手更何时。
不复人间见，只应海上期。
清谿入云木，白首卧茅茨。
共惜卢敖去，天边望所思。

卷 134_10

【送顾朝阳还吴】李颀

寂寞俱不偶，裹粮空入秦。
宦途已可识，归卧包山春。
旧国指飞鸟，沧波愁旅人。
开樽洛水上，怨别柳花新。



卷 134_11

【送窦参军】李颀

城南送归客，举酒对林峦。
暄鸟迎风啭，春衣度雨寒。
桃花开翠幕，柳色拂金鞍。
公子何时至，无令芳草阑。

卷 134_12

【望秦川】李颀

秦川朝望迥，日出正东峰。
远近山河净，逶迤城阙重。
秋声万户竹，寒色五陵松。
客有归欤叹，凄其霜露浓。

卷 134_13

【晚归东园】李颀

荆扉带郊郭，稼穡满东菑。
倚杖寒山暮，鸣梭秋叶时。
回云覆阴谷，返景照霜梨。
澹泊真吾事，清风别自兹。

卷 134_14

【觉公院施乌石台】李颀

石台置香饭，斋后施诸禽。
童子亦知善，众生无惧心。
苔痕苍晓露，盘势出香林。
锡杖或围绕，吾师一念深。

卷 134_15

【箴笋】李颀

东园长新笋，映日复穿篱。
迸出依青嶂，攒生伴绿池。
色因林向背，行逐地高卑。
但恐春将老，青青独尔为。

卷 134_16

【达奚吏部夫人寇氏挽歌】李颀

存歿令名传，青青松柏田。
事姑称孝妇，生子继先贤。
露湿铭旌重，风吹卤簿前。
阴堂从此闭，谁诵女师篇。



卷 134_17

【寄司勋卢员外】李颀

流澌腊月下河阳，草色新年发建章。
秦地立春传太史，汉宫题柱忆仙郎。
归鸿欲度千门雪，侍女新添五夜香。
早晚荐雄文似者，故人今已赋长杨。

卷 134_18

【寄綦毋三】李颀

新加大邑绶仍黄，近与单车去洛阳。
顾眄一过丞相府，风流三接令公香。
南川粳稻花侵县，西岭云霞色满堂。
共道进贤蒙上赏，看君几岁作台郎。

卷 134_19

【送魏万之京】李颀

朝闻游子唱离歌，昨夜微霜初渡河。
鸿雁不堪愁里听，云山况是客中过。

关城树色催寒近，御苑砧声向晚多。
莫见长安行乐处，空令岁月易蹉跎。

卷 134_20

【送李回】李颀

知君官属大司农，诏幸骊山职事雄。
岁发金钱供御府，昼看仙液注离宫。
千岩曙雪旌门上，十月寒花辇路中。
不睹声明与文物，自伤流滞去关东。

卷 134_21

【宿莹公禅房闻梵】李颀

花宫仙梵远微微，月隐高城钟漏希。
夜动霜林惊落叶，晓闻天籁发清机。
萧条已入寒空静，飒沓仍随秋雨飞。
始觉浮生无住著，顿令心地欲皈依。

卷 134_22

【题璿公山池】李颀

远公遁迹庐山岑，开士幽居祇树林。
片石孤峰窥色相，清池皓月照禅心。
指挥如意天花落，坐卧闲房春草深。
此外俗尘都不染，惟馀玄度得相寻。

卷 134_23

【题卢五旧居】李颀

物在人亡无见期，闲庭系马不胜悲。
窗前绿竹生空地，门外青山如旧时。
怅望秋天鸣坠叶，巉岈枯柳宿寒鸱。
忆君泪落东流水，岁岁花开知为谁。

卷 134_24

【赠别张兵曹】李颀

汉家萧相国，功盖五诸侯。
勋业河山重，丹青锡命优。
君为禁脔婿，争看玉人游。
荀令焚香日，潘郎振藻秋。
新成鹦鹉赋，能衣鹔鹕裘。
不惮轩车远，仍寻薜荔幽。
苑梨飞绛叶，伊水净寒流。
雪满故关道，云遮祥凤楼。
一身轻寸禄，万物任虚舟。
别后如相问，沧波双白鸥。

卷 134_25

【宿香山寺石楼】李颀

夜宿翠微半，高楼闻暗泉。
渔舟带远火，山磬发孤烟。
衣拂云松外，门清河汉边。
峰峦低枕席，世界接人天。
霭霭花出雾，辉辉星映川。
东林曙莺满，惆怅欲言旋。

卷 134_26

【圣善阁送裴迪入京】李颀

云华满高阁，苔色上钩栏。
药草空阶静，梧桐返照寒。
清吟可愈疾，携手暂同欢。
坠叶和金磬，饥乌鸣露盘。
伊流惜东别，灞水向西看。
旧托含香署，云霄何足难。

卷 134_27

【奉送漪叔游颍川兼谒淮阳太守】李颀

罢吏今何适，辞家方独行。
嵩阳入归梦，颍水半前程。
闻道淮阳守，东南卧理清。
郡斋观政日，人马望乡情。
叠岭雪初霁，寒砧霜后鸣。
临川嗟拜手，寂寞事躬耕。



卷 134_28

【二妃庙送裴侍御使桂阳】李颀

沉上秋草晚，苍苍尧女祠。
无人见精魄，万古寒猿悲。
桂水身殁后，椒浆神降时。
回云迎赤豹，骤雨飒文狸。
受命出炎海，焚香征楚词。
乘骢感遗迹，一吊清川湄。

卷 134_29

【送暨道士还玉清观】李颀

仙宫有名籍，度世吴江滨。
大道本无我，青春长与君。
中州俄已到，至理得而闻。
明主降黄屋，时人看白云。
空山何窈窕，三秀日氛氲。
遂此留书客，超遥烟驾分。

卷 134_30

【送刘主簿归金坛】李颀

与子十年旧，其如离别何。
宦游邻故国，归梦是沧波。
京口青山远，金陵芳草多。
云帆晓容裔，江日昼清和。
县郭舟人饮，津亭渔者歌。
茅山有仙洞，羡尔再经过。

卷 134_31

【送卢少府赴延陵】李颀

问君从宦所，何日府中趋。
遥指金陵县，青山天一隅。
行人怀寸禄，小吏献新图。
北固波涛险，南天风俗殊。
春江连橘柚，晚景媚菰蒲。
漠漠花生渚，亭亭云过湖。
滩沙映村火，水雾敛樯乌。
回首东门路，乡书不可无。

卷 134_32

【送皇甫曾游襄阳山水兼谒韦太守】李颀

岷山枕襄阳，滔滔江汉长。
山深卧龙宅，水净斩蛟乡。
元凯春秋传，昭明文选堂。
风流满今古，烟岛思微茫。
白雁暮冲雪，青林寒带霜。
芦花独戍晚，柑实万家香。
旧国欲兹别，轻舟眇未央。
百花亭漫漫，一柱观苍苍。
按俗荆南牧，持衡吏部郎。
逢君立五马，应醉习家塘。

卷 134_33

【龙门送裴侍御监五岭芽】李颀

万里番禺地，官人继帝忧。
君为柱下史，将命出东周。
歇马傍川路，张灯临石楼。
棱棱静疏木，淅淅响寒流。
榔叶四荒外，梅花五岭头。
明珠尉佗国，翠羽夜郎洲。
夷俗富珍产，土风资宦游。
心清物不杂，弊革事无留。
举善必称最，持奸当去尤。
何辞桂江远，今日用贤秋。



卷 134_34

【送乔琳】李颀

草绿小平津，花开伊水滨。
今君不得意，辜负帝乡春。
口不言金帛，心常任屈伸。
阮公惟饮酒，陶令肯羞贫。
阳羨风流地，沧江游寓人。
菱歌五湖远，桂树八公邻。
青鸟迎孤棹，白云随一身。
潮随秣陵上，月映石头新。
未可逃名利，应须在缙绅。
汀洲芳杜色，劝尔暂垂纶。

卷 134_35

【题少府监李丞山池】李颀

能向府亭内，置兹山与林。
他人骖驔马，而我薜萝心。
雨止禁门肃，莺啼官柳深。
长廊閤军器，积水背城阴。
窗外王孙草，床头中散琴。
清风多仰慕，吾亦尔知音。

卷 134_36

【长寿寺絜公院新甃井】李颀

僧房来往久，露井每同观。
白石抱新甃，苍苔依旧栏。
空瓶宛转下，长绠辘轳盘。
境界因心净，泉源见底寒。
钟鸣时灌顶，对此日闲安。



卷 134_37

【魏仓曹宅各赋一物得当轩石竹】李颀

罗生殊众色，独为表华滋。
虽杂蕙兰处，无争桃李时。
同人趋府暇，落日后庭期。
密叶散红点，灵条惊紫蕤。
芳菲看不厌，采摘愿来兹。

卷 134_38

【奉送五叔入京兼寄綦母三】李颀

云阴带残日，怅别此何时。
欲望黄山道，无由见所思。

卷 134_39

【寄韩鹏】李颀

为政心闲物自闲，朝看飞鸟暮飞还。
寄书河上神明宰，羡尔城头姑射山。

卷 134_40

【百花原（一作王昌龄《出塞行》）】李颀

百花原头望京师，黄河水流无已时。
穷秋旷野行人绝，马首东来知是谁。

卷 134_41

【遇刘五】李颀

洛阳一别梨花新，黄鸟飞飞逢故人。
携手当年共为乐，无惊蕙草惜残春。

卷 134_42

【送崔婴赴汉阳】李颀

中外相连弟与兄，新加小县子男名。
才年三十佩铜印，知尔弦歌汉水清。

卷 134_43

【送五叔入京兼寄綦毋三】李颀

吏部明年拜官后，西城必与故人期。
寄书春草年年色，莫道相逢玉女祠。

卷 134_44

【野老曝背】李颀

百岁老翁不种田，惟知曝背乐残年。
有时扪虱独搔首，目送归鸿篱下眠。

卷 134_45

【送东阳王太守（末缺）】李颀

江皋杜蘅绿，芳草日迟迟。
桼楫今何去，星郎出守时。
彤襜问风俗，明主寄惻嫠。
令下不徒尔，人和当在兹。
昔年经此地，微月有佳期。
洞口桂花白，岩前春草滋。
素沙静津濑，青壁带川坻。
野鹤每孤立，林鹪常昼悲。

卷 134_46

【咏张謐山水（末缺）】李颀

小山破体闲支策，落日梨花照空壁。
诗堪记室妒风流，画与将军作勍敌。



卷 134_47

【失题（末缺）】李颀

紫极殿前朝伏奏，龙华会里日相望。
别离岁岁如流水，谁辨他乡与故乡。

